

四庫全書

史部

欽定四庫全書

金史卷四十三

元中書右丞相總裁托克托等修

志第二十四

輿服上

天子車輅  
皇太子車制

皇后妃嬪車輦  
王公以下車制及鞵勒飾

古者車輿之制各有名物表識以祀以封以田以戎所以別上下明等威也歷代相承互有損益或因時創始或襲舊致文奇巧日滋浮靡益蕩加以後世便習騎乘

車用蓋寡惟於郊廟祀享法駕導引為一代令儀而不敢廢也其於先王經世立法之意寥乎闕哉金初得遼之儀物既而克宋於是乎有車輅之制熙宗幸燕始用法駕迨至世宗制乃定班班乎古矣考禮文證國史以見一代之制度云

大定十一年將有事於南郊命太常寺檢宋南郊禮圖簿當用玉輅金輅象輅革輅木輅耕耜車明遠車指南車記里鼓車崇德車皮軒車進賢車黃鉞車白鷺車駕

旗車豹尾車輅車羊車各一革車五屬車十二除見有  
車輅外闕象木革輅耕根明遠皮軒進賢白鷺羊車大  
輦各一革車三屬車四按五禮新儀玉輅以青金輅以  
緋象輅以銀褐革輅以黃木輅以皂蓋其物有合隨輅  
之色者有當用別色者如玉輅用青絲繡雲龍絡帶青  
羅繡寶相花帶青畫輪轅青羗牛尾此隨輅之色者也  
若象木革輅則當用緋用銀褐用黃乃皂若至尊乘御  
步武所及非若餘物但為美觀其踏牀倚背踏道之褥

皆用紅錦座褥及行馬褥透壁軟簾三用銀褐黃青羅錦三色又大輦末陶穀創意為之至祥符中以其太重減七百餘斤可見當時亦無定制各以意從長斟酌造之其制金玉輅闕可見者象輅革輅木輅耕根皮軒進賢明遠白鷺羊車革車大輦凡十有一象輅黃質金塗銅裝以象飾諸末輪衣銀褐建大赤餘同玉輅革輅黃質鞮之以革金銅塗裝輪衣以黃建大白餘同玉輅木輅黑質漆之輪衣以皂建大麾餘同玉輅耕

根車青質蓋三重制如玉輅而無玉飾 及軒車亦質  
上有漆柱貫五輪相重畫虎紋一轅 進賢車亦質如  
革車緋輪衣絡帶門簾並鳳上設朱漆牀香案紫綾衣  
一轅 明遠車制如屋銳頂重簷勾欄頂上有金四角  
垂鐸上層四面垂簾下層周以花板三轅 白鷺車亦  
質周施花板上有漆柱柱杪刻為鷺鷥銜鵝毛筍紅綾  
帶柱貫五輪相重輪衣皂頂緋裙緋絡帶並繡飛鷺一  
轅 羊車赤質兩壁油畫龜紋金鳳翅幘衣結帶並繡

瑞羊二轅 大輦赤質正方油畫金塗銀葉龍鳳裝其上四面施行龍雲朵火珠方鑑銀絲囊網珠翠結雲龍鈿窠霞子四角龍頭御香囊頂輪施耀葉中有銀蓮花坐龍紅綾裏碧牙壓帖內設圓鑑香囊銀輪鈎欄臺坐紫絲條網盼鎔中施黃褥上置御座曲几香鑪錦結綬几衣輪衣絡帶並緋繡雲龍寶相花金綫壓長竿四飾以金塗銀龍頭畫梯托义行馬 七寶輦制如大輦飾以玉裙網七寶滴子用真珠朱欽宗為上皇製海陵自

汴取而用之

皇后之車六一曰重翟車青質金飾金塗銅釵花葉段  
裝釘耀葉二十四明金立鳳一紫羅銷金生色寶相帷  
一青羅青油幘衣各一朱絲絡網紫羅明金生色雲龍  
絡帶各二兩廂明金五彩間裝翟羽二金塗礪石長輪  
鳳頭三橫轅立鸞八香鑪香寶子一副宜男錦帶結朱  
紅漆杌子踏床各一扶板扶魚一副紅羅明金衣褥紅  
羅襯褥一青羅行道褥四青羅明金生色雲鳳夾幔一



紅羅明金綠紅竹簾二金塗銅葉斷行馬二朱紅漆金  
塗銀葉裝釘胡梯一青羅胡梯尋儀褥二踏道褥十青  
絹裏大麻索二油蒙帕一二曰厭翟車赤質倒仙錦帷  
一紫羅紫油幘衣各一朱絲絡網宜男錦絡帶各二餘  
同重翟惟行道夾幔尋儀褥羅及裏索等用紅三曰翟  
車黃質金飾礪石裝假裝釘宜男錦帷黃羅油幘衣礪  
石長轅鳳頭三而無橫轅立鸞餘同厭翟而羅色用黃  
四曰安車赤質倒仙錦帷紫油幘衣朱絲絡網天下樂

錦絡輦硨石長轆鳳頭三無橫轆立鸞及香鑪香寶子  
餘同翟車而色皆用紅五曰四望車朱質宜男錦帷青  
油幘衣轆端螭頭二餘並同安車六曰金根車朱質紫  
羅紫幘油衣朱絲倒仙錦絡帶各二踏牀褥用紅綾衣  
尋儀褥踏道褥並同綾餘並同安車造六車成後復改  
造圓輅重簷方輅五華亭頭平頭六等之制又增制九  
龍車一高二丈廣一丈一尺長二丈六尺五鳳車四各  
高一丈八尺長廣如之圓輅車一方輅車一重簷車一

各高一丈七尺長一丈八尺廣八尺皆駕馬四駕士各五十人並平巾幘生青色青緋黃三色寶相花衫褐抹帶大口袴平頭輦一五華輦一亭頭輦一各高一丈九尺廣丈五寸長三寸舁士各九十六人作兩番代並生色緋寶相花衫餘如前製管押人員三十五人長脚幘頭紫羅窄衫金銅帶束駕馬繫纓涼傘鈴拂色尾皆從車色金銅面插翟尾朱轡朱總龍車合用紅傘羅一傘子二人用本服錦帽幘頭帶又檢定扇障等制偏扇仙

人羽扇行障六扇各長八尺高六尺用紅羅表朱裏畫  
雲鳳龍首竿銜輦結每障用宮人四坐障二扇各長七  
尺高五尺畫雲鳳紅羅表朱裏餘同行障錦六柱八扇  
各闊二尺高三尺冒以錦內給使八人執宮人車制如  
屬車駕士八人平巾幘緋衫大口袴鞋襪供奉宮人三  
十人雲腳紗帽紫衫束帶綠靴明昌元年三月定妃嬪  
車輦用鍍金鳳頭黃結御妻世婦用間金鳳頭梅紅結  
子

皇太子車制大定六年十二月奏皇太子金輅典故制  
度及上用金輅儀式奉敕詳定輶旗旂首及應用龍者  
更以麟為飾省去鄣塵等物上用金輅名件色數依上  
公以九為節減四分之一上用輅軾前有金龍改為伏  
鹿軾上坐龍改為鳳旂十二旒減為九駕赤騶六減為  
四及簾褥用黃羅處改用梅紅餘並具體成造其制赤  
質金飾諸末重較箱畫虞文鳥獸黃屋軾作赤伏鹿龍  
輶金鳳一軾前設障塵朱蓋黃裏輪畫朱牙左建九旒

右載闔戟旂首銜金龍頭結綬及鈴綾八鷹在衡二鈴  
在軾駕赤騮四金鍔方鉞插翟尾鏤錫鞶纓九就皇帝  
輅自頂至地高一丈七尺今綢四分之一為一丈三尺  
二寸修廣之綢亦如之

王公以下車制一品轅用銀螭頭涼棚杆子月板並許  
以銀裝飾三品以上螭頭不得施銀涼棚杆子月板亦  
聽用銀為飾五品以上轅獅頭六品以上轅雲頭庶人  
坐車平頭止用一色黑油

親王鞍塗金銀裏仍釵以開花障泥用紫羅飾以錦轡以塗金銀裝束用絲結皇家小功以上太皇太后皇太后大功以上皇后期親以上并一品官及官職俱至三品以上者障泥許用金若經賜或御毡場內不在禁限舊制親王宰執任外者與大興尹皆服小冒束帶銀鞍絲鞭大定中世宗以京尹亦外官三品而與親王無別遂命不得御銀鞍絲鞭惟同外三品例幘頭帶展皂視事

承安二年制護衛銅裝鞍轡不得借人庶人鞍馬許用  
黑漆以骨角鐵為飾不得用玉較具及金銀犀象飾鞍  
轡

輿服中

天子衮冕  
皇后冠服

視朝之服  
皇太子冠服

宗室外戚及一品命婦服用  
祭服 公服 臣下朝服

昔者聖人制為玄黃黼黻之服以象天地之德以章貴  
賤之儀夏商損益至周大備不可以有加矣自秦滅棄  
禮法先王之制靡敝不存漢初猶服衾玄以從大祀歷



代雖漸復古制亦不純而已金制皇帝服通天絳紗衮冕偏舄即前代之遺制也其臣有貂蟬法服即所謂朝服者章宗時禮官請參酌漢唐更製祭服青衣朱裳去貂蟬豎筆以別於朝服惟公朝則又有紫緋綠三等之服與夫窄紫服展皂等事悉著于篇云

天眷三年有司以車駕將幸燕京合用通天冠絳紗袍據見闕名件依式成造禮服袍裳方心曲領中單蔽膝革帶大帶玉具劍綬佩舄韞乘輿服大綬六采黑黃赤

白縹綠小綬三色同大綬間施三玉環大綬五百首小綬半之白玉雙佩革帶玉鉤釧

冕制天板長一尺六寸廣八寸前高八寸五分後高九寸五分身圍一尺八寸三分并納言並用青羅為表紅羅為裏週迴用金稜天板下有四柱四面珍珠網結子花素墜子前後珠旒共二十四旒各長一尺二寸青碧線織造天河帶一長一丈二尺闊二寸兩頭各有真珠金碧旒三節玉滴子節花紅線組帶二上有真珠金翠

旒玉滴子節花下有金鐸子二枚紅線款幔帶一鞋繡  
二真珠垂繫上用金夢子二簪窠款幔組帶鈿窠各二  
內組帶鈿窠四並玉鏤塵碾造玉簪一頂方二寸導長  
一尺二寸簪頂刻鏤塵雲龍

袞用青羅夾製五綵間金繪畫正面日一月一昇龍四  
山十二上下襟華蟲火各六對虎雉各六對背面星一  
昇龍四山十二華蟲火各十二對虎雉各六對中單一  
白羅單製羅領襍襖裳一帶襍襖紅羅八幅夾製繡藻

三十一粉十六米黼三十二蔽三十二蔽膝蔽膝一帶  
襍襖並紅羅夾製繡昇龍二綬一幅大綬以赤黃黑白  
祿襍六綵織紅羅托裏小綬三色同大綬銷金黃羅綬  
頭上間施三玉環皆刻雲龍大綬五百首小綬半之緋  
白大綬一銷金黃羅帶頭鈿窠二十四紅羅勒帛一青  
羅抹帶一玉佩二白玉上中下環各一半月各二皆刻  
雲龍玉滴子各二皆以真珠穿製金篋鈎獸面水葉環  
釘涼帶一紅羅裏鏤金上有玉鵝七錠尾束各一金攀

龍口以玳瑁板襯釘脚舄重底紅羅面白綾托裏如意  
頭鎖金黃羅緣口玉鼻仁飾以珠韞用緋羅加綿凡大  
祭祀加尊號受冊寶則服袞冕行幸齋戒出宮或御正  
殿則通天冠絳紗袍

鎮圭大圭皇統九年十月二十四日禮部下太常書鎮  
圭式樣大禮使據三禮圖以進用之大定十一年太常  
寺按禮大圭長三尺抒上終葵首天子服之自西魏隋  
唐以來大圭長一尺二寸與鎮圭同蓋鎮圭以鎮天下

四鎮山為飾今其圭已依古制惟無大圭今御府有故  
宋曰玉圭圓無上綢及終葵首自西魏以來所制玉笏  
皆長尺有二寸而不折雖非先王之法蓋後世王難得  
隨宜故也擬合以御府所藏行禮就用

視朝之服初太宗即位始服赭黃自後視百官朝御袍  
帶章宗即位以世宗之喪有司請御純吉不從乃服淡  
黃袍烏犀帶常朝則服小帽紅襴偏帶或束帶

皇后冠服花珠冠用盛子一青羅表青絹襖金紅羅托

裏用九龍四鳳前面大龍銜穗毬一朵前後有花珠各十有二  
及鷓鴣孔雀雲鷁王母隊仙人浮動捧瓣等後有納言上有金  
蟬鏤兩博鬚以上並用鋪翠滴粉鏤金裝珍珠結製下有金圈  
口上用七寶鈿窠後有金鈿窠二穿紅羅鋪金欵幔帶一

褱衣深青羅織成翬翟之形素質十二等領標襖並紅  
羅織成雲龍中單以素青紗製領織成輔形十二標袖襖  
織成雲龍並織紅縠造裳八副深青羅織成翟文六等  
標襖織成紅羅雲龍明金帶腰蔽膝深青羅織成翟

丈三等領緣緞色羅織成雲龍明金帶大綬一長五尺  
闊一尺黃赤白黑縹綠六彩織成小綬三色同大綬間  
七寶鈿窠施三玉環上碾雲龍拏金線織成大小綬頭  
紅羅花襯大帶青羅朱裏紉其外上以朱錦下以綠錦  
紐約用青組拏金線織成帶頭玉佩二朶每朶上中下  
橫各一半月墜子二並玉碾縷金打鈿獸面篋鈎佩  
子各一水葉子真珠穿綴青衣革帶用縷金青羅裏造  
上用金打鈿水地龍鵠眼鉈尾龍口拳束子共八事以



玳瑁襯金釘脚抹帶二紅羅青羅各一並明金造各長  
一丈五寸爲以青羅製白綾裏如意頭明金黃羅準上  
用玉鼻仁真珠裝綴繫帶韞青羅表裏綴繫帶

犀冠減撥花樣縷金裝造上有玉簪一下有玳瑁盤一  
皇太子冠服冕用白珠九旒紅絲組爲纓青縹充耳犀  
簪導衣青衣朱裳五章在衣山龍華蟲火宗彝四章在  
裳薄粉米黼黻白紗中單青襖襖裾玉帶塗金銀鈎膝  
蔽膝隨裳色爲火山二章瑜玉雙佩四采織成大綬間

施玉環三白韞朱烏爲加金塗銀釦謁廟則服之

遠遊冠十八梁金塗銀花飾博山附蟬紅絲組爲纓犀簪導朱明服紅裳白紗中單方心曲領絳紗蔽膝白襪黑烏餘同袞冕冊寶則服之

桓圭長九寸廣三寸厚半寸用之玉若屋之桓楹爲二稜太子入朝起居及與宴則朝服紫袍玉帶雙魚袋其視事及見師少賓客則服小帽皂衫玉束帶

宗室及外戚并一品命婦衣服聽用明金期親雖別籍

女子出嫁並同又五品以上官母妻許披霞帔唯首飾  
霞帔領袖腰帶許用明金籠金間金之類其衣服止用  
明銀象金及金條壓繡正班局分承應帶官人雖未出  
職係班其祖母及母妻子孫之婦同籍兄弟之妻及在  
室女孫姊妹並同又禁私家用純黃帳幕陳設若曾經  
宣賜鸞輿服御日月雲肩龍文黃服五箇鞞眼之鞍皆  
須更改

臣下朝服見導駕及行大禮文武百官皆服之正一品

貂蟬籠巾七梁額花冠貂鼠立筆銀立筆犀簪導佩劍  
緋羅大袖緋羅裙緋羅蔽膝各一緋白羅大帶天下樂  
暈錦玉環綬一白羅方心曲領白紗中單銀褐勒帛各  
一玉珠佩二金塗銀革帶烏皮履白綾戰正二品七梁  
冠銀立筆犀簪導不佩劍緋羅大袖雜花暈錦玉環綬  
餘並同正四品五梁冠銀立筆犀簪白獅錦銀環綬珠  
佩銀革帶御史中丞則獬豸冠青荷蓮綬餘並同正五  
品四梁冠簇四金鵬錦銅環綬銀珠佩餘並同正六品

至七品三梁冠黃獅錦銅環綬珠佩銅束帶餘並同大  
定二十二年祫享攝官尊駕二品冠七梁三品四品冠  
六梁服有金花五品冠五梁六品冠四梁七品冠三梁  
監察御史獬豸冠青綬八品九品冠二梁餘制並同

三品

舊無

祭服皇統七年太常寺言太廟成後奉安神主祫享行  
禮凡行事執事助祭陪位官準古典當服袞冕九章畫  
降龍隨品各有等差通典云虞夏殷並十二章日月星

辰山龍華蟲作繪於衣宗彛蕩火粉米黼黻絺繡於  
裳周升三辰於旂登龍於山登火於宗彛作九章之服山  
龍華蟲火宗彛繪於衣蕩粉米黼黻繡於裳公之服自  
衮冕而下如王之服侯伯之服自鷩冕而下如公之服  
又後魏帝服衮冕與祭者皆朝服又開元禮一品服九  
章又五禮新儀正一品服九旒冕犀簪青衣畫降龍今  
汴京舊禮直官言自宣和二年已後一品祭服七旒冕  
大袖無龍唐雖服九章服當時司禮少常伯孫茂道言

諸臣之章雖殊然飾龍名袞尊卑相亂請於三公服冕  
八章為宜臣等竊謂歷代衣服之制不同若從後魏則  
止服朝服或用宋服則為七章若遵唐九章則有飾龍  
名袞尊卑相亂之議尚書省乃奏用後魏故事止用燕  
京大冊禮時所服朝服以祭大定三年八月詔遵皇統  
制攝官則朝服散官則公服以皇太子為亞獻服袞冕  
十四年用唐制若祭遇雨雪則服常服今謂之公服也  
泰和元年八月禮官言祭服所以接神朝服所以事君

雖歷代損益不同然未嘗不有分別是以袞冕十二章旒  
玄衣纁裳備十二章天子之祭服也通天冠絳紗袍紅  
羅裳天子之視朝服也臣下之服則用青衣朱裳以祭  
朱衣朱裳以朝國朝惟天子備袞冕通天冠二等之服  
今羣臣但有朝服而祭服尚闕每有祀事但以朝服從  
事實於典禮未當請依漢唐故事祭服冕旒畫章然君  
冕服章數各殊而俱飾龍名袞而唐孫茂道已有尊卑  
相亂之倫然三公法服有龍恐涉於僭國初禮官亦



嘗駁議乞參酌古今改置祭服其冠則如朝冠而但去其貂蟬豎筆其服用青衣朱裳白韞朱履緋攝事者則用朝服庶幾少有差別上曰朝祭之服固宜分也

公服大定官制文資五品以上官服紫三師三公親王宰相一品官服大獨科花羅徑不過五寸執政官服小獨科花羅徑不過三寸二品三品散搭花羅謂無枝葉者徑不過寸半四品五品服小雜花羅謂花頭碎小者徑不過一寸六品七品服緋芝蔴羅八品九品服綠無

紋羅應武官皆服紫凡散官職事皆從一高上得兼下  
下不得僭上窄紫亦同服色各依官制品格其諸局分  
承應人並用無紋素羅十五年制曰袍不加襴非古也  
遂命文資官公服皆加襴帶制皇太子玉帶佩玉雙魚  
袋親王玉帶佩玉魚一品玉帶佩金魚二品笏頭毬文  
金帶佩金魚三品四品荔枝或御仙花金帶並佩金魚  
五品服紫者紅鞵烏犀帶佩金魚服緋者紅鞵烏犀帶  
佩銀魚服綠者並皂鞵烏犀帶武官一品二品佩帶同

三品四品金帶五品六品七品紅鞵烏犀帶皆不佩魚  
八品以下並皂鞵烏犀帶司天太醫內侍教坊服皆同  
文武官惟不佩魚應殿庭承應五品以下官非入內不  
許金帶又展紫入殿庭者並許服紅鞵不佩魚又二品  
以上官許兼服通犀帶三品官若治事若見賓客許兼  
服花犀帶大定二年制百官趨朝赴省並須裹帶五品  
以上官趨朝則朝服赴省則展皂雨雪沾衣則從便凡  
朝參主賓主符展紫御仙花或太平花金束帶近侍給

使供御筆硯直長符寶吏紫襖三塗金束帶輪直則近侍給使並常服常服則展紫閣門六尚遇朝參侍立則服本品服若宮中當直則服窄紫金帶學士院官修起居注補闕拾遺秘書丞秘書郎朝參侍立則服本品服色帶當直則窄紫金帶東宮左右衛率僕正副僕正典儀贊儀內直郎丞當直亦許服之太子太師出入宮中則展紫至東宮則展皂三少則展紫

輿服下

衣服通制

君子之服以稱德也故德之備者其文備古者王公及士庶人莫不各有一定之制而不敢相逾者蓋風俗之奢儉法令之齊一必於是而觀焉詩曰彼都人士狐裘黃黃其容不改出言有章其三章曰彼都人士充耳琇實彼君子女謂之尹吉此言都邑之盛人物之懿也明昌間章宗謂宰臣曰今風俗侈靡莫若律以制度使貴賤有等其令禮部具典故以聞他日又謂參知政事張萬公曰山東風俗何如萬公對以奢左丞守貞因言衣

服之制上曰如卿所言正恐失人心耳守貞曰止是商賈有不悅者萬公曰乞寬與之期三年之內當如制矣於是上以禮部所擬太繁以尚書省所擬而行之嗟乎人君以風俗為言其亦知所務矣

金人之常服四帶巾盤領衣烏皮靴其束帶曰陶罕巾之制以皂羅若紗為之上結方頂折垂于後頂之下際兩角各綴方羅徑二寸許方羅之下各附帶長六七寸當橫額之上或為一縮襍積貴顯者於方頂循十字縫

飾以珠其中必貫以大者謂之頂珠帶旁各絡珠結綬長半帶額之海陵賜大興國者是也其衣色多白三品以皂窄袖盤領縫腋下為襍積而不缺袴其胷臆肩袖或飾以金繡其從春水之服則多鶻捕鵝雜花卉之飾其從秋山之服則以焦鹿山林為文其長中氍取便於騎也陶罕玉為上金次之犀象骨角又次之鈐周韎小者間置於前大者施於後左右有雙鉞尾納方朶中其刻琢多如春水秋山之飾左佩牌右佩刀刀貴鑲柄尚鶻

古木黃黑相半有黑雙距者為上或三事五事室飾以醬辦樺鐫口飾以鮫或屑金鍮和漆塗鮫隙而礪平之醬辦樺者謂樺皮斑文色殷紫如醬中豆辦也產其國故尚之初女直人不得改為漢姓及學南人裝束違者杖八十編為永制婦人服襜裙多以黑紫上編繡全枝花周身六瓣積上衣謂之團衫用黑紫或皂及紺直領左衽掖縫兩傍復為雙瓣積前拂地後曳地尺餘帶色用紅黃前雙垂至下齊年老者以皂紗籠髻如巾狀散



綴玉鈿於上謂之玉逍遙此皆遼服也金亦襲之許嫁之女則服綽子製如婦人服以紅或銀褐明金為之對襟彩領前齊拂地後曳五寸餘

明昌六年制文武官六貫石以上承應人并及廕者許用牙領紫圓板皂條羅帶皂靴上得兼下係籍儒生止服白衫領繫背帶並以紫圓條羅帶乾皂靴餘人用純紫領不得用緣雜色圓板條羅帶不得用紫靴用黃及黑油皂蠟等婦人各從便泰和四年以親王品官既分

領緣而復有皂靴之禁似涉大煩遂聽親王用銀褐領紫緣品官皆紫領白緣餘從明昌制

書袋之制大定十六年世宗以吏員與士民之服無別潛入民間受賕鬻獄有司不能檢察遂定懸書袋之制省樞密院令譯史用紫紵絲為之臺六部宗正統軍司檢察司以黑斜皮為之寺監隨朝諸局并州縣並黃皮為之各長七寸闊二寸厚半寸並於束帶上懸帶公退則懸於便服違者所司糾之

大定十三年太常寺擬士人及僧尼道女冠有師號并  
良間官八品以上許服花紗綾羅絲紬在官承應有出  
身人帶八品以下官未帶官亦同許服花紗綾羅紵絲  
絲紬家屬同婦人許用珠為首飾其都孔目與八品間  
官同京府州縣司吏皆與庶人同庶人止許服純紬絹  
布毛褐花紗無紋素羅絲綿其頭巾繫腰領帕許用芝  
麻羅條用絨織成者不得以金玉犀象諸寶瑪瑙玻璃  
之類為器皿及裝飾刀把鞘并銀裝釘牀榻之類婦人

首飾不許用珠翠鈿子等物翠毛除許裝飾花環冠子  
餘外並禁兵卒許服無紋壓羅絁絹布毛褐奴婢止  
許服絁絹布毛褐倡優遇迎接公筵承應許暫服繪  
畫之服其私服與庶人同

金史卷四十三

欽定四庫全書

金史卷四十四

元中書右丞相總裁托克托等修

志第二十五

兵

兵制 禁軍之制  
養兵之法

金興用兵如神戰勝攻取無敵當世曾未十年遂定大業原其成功之速俗本驚動人多沉雄兄弟子姪才皆良將部落保伍技皆銳兵加之地狹產薄無事苦耕可

給衣食有事苦戰可致俘獲勞其筋骨以能寒暑徵發  
調遣事同一家是故將勇而志一兵精而力齊一旦奮  
起變弱為彊以寡制衆用是道也及其得志中國自顧  
其宗族國人尚少乃割土地崇位號以假漢人使為之  
効力而守之明安穆昆雜厠漢地聽與契丹漢人皆因  
以相固結迨夫國事寢盛則歸土地削位號罷遼東渤  
海漢人之襲明安穆昆者漸以兵柄歸其內族然樞府  
簽軍募軍兼采漢制伐宋之役叅用漢軍及諸部族而

統以國人非不知制勝長策在於以志一之將用力齊之兵也第以土宇既廣豈得盡任其所親哉馴致極盛乃自患其宗族國人之多積其猜疑卒自戕賊遂致強本刊落醇風鏤薄將帥攜離兵士驕惰迄其亡也忠孝等軍構難于內亂軍雜人召禍於外向之所謂志一而力齊者不見可恃之勢焉豈非自壞其家法而致是歟抑是道也可用於新造之邦不可以保長久之天下歟金以兵得國奉詔作金史故於金之兵志考其興亡得



失之跡特著於斯兵制馬政養兵等法載諸舊史者臚  
列于篇

金之初年諸部之民無它徭役壯者皆兵平居則聽以  
佃漁射獵習為勞事有警則下令部內及遣使詣諸貝  
勒徵兵凡步騎之仗糗皆取備焉其部長曰貝勒行兵  
則稱曰明安穆昆從其多寡以為號明安者千夫長也  
穆昆者百夫長也穆昆之副曰富埒瑋士卒之副從曰  
伊勒希部卒之數初無定制至太祖即位之二年既以

二千五百破耶律色實始命以三百戶為穆昆穆昆十  
為明安繼而諸部來降率用明安穆昆之名以授其首  
領而部伍其人珠赫之戰兵始滿萬而遼莫敵矣及拉  
林鴨水鐵驪拜格之民皆附東京既平山西繼定內收  
遼漢之降卒外籍部族之健士嘗用遼人額哩頁以北  
部百三十戶為一穆昆漢人王六兒以諸州漢人六十  
五戶為一穆昆王伯龍及高從祐等並領所部為一明  
安至天會二年平州既平宗望恐風俗揉雜民情弗便

乃罷是制諸部降人但置長吏以下從漢官之號五年  
伐宋之役調燕山雲中中京上京東京遼東平州遼西  
長春八路民兵隸諸萬戶其間萬戶亦有專統漢軍者  
熙宗皇統五年又罷遼東漢人渤海明安穆昆承襲之  
制浸移兵柄於其國人乃分明安穆昆為上中下三等  
宗室為上餘次之至海寧庶人天德二年省併中京東  
京臨潢咸平泰州等路節鎮及明安穆昆削上中下之  
名但稱為諸明安穆昆循舊制間年一徵發以補老疾

死亡之數貞元遷都遂徙上京路太祖遼王宗幹秦王  
宗翰之明安併為哈濟明安及右諫議沃哩布明安太  
師勗宗正宗敏之族處之中都沃拔和尚呼喇三國公  
太保昂詹事烏哩雅輔國博勒和定遠蘇勒庫梁國公  
伯特八明安處之山東阿魯之族處之北京諳達族屬  
處之河間二年命兵部尚書蕭仲恭等與舊兵皆分隸  
諸總管府節度使授田牛使之耕食以蕃衛京國六年  
南伐立三道都統制府及左右領軍大都督將三十二

軍以神策神威神捷神銳神毅神翼神勇神果神畧神  
鋒武勝武定武威武安武捷武平武成武毅武銳武揚  
武翼武震威定威信威勝威捷威烈威毅威震威畧威  
果威勇為名軍置都總管副總管及巡察使副各一員  
而沿邊契丹恐妻孥被鄰寇鈔掠不可盡行遂皆背叛  
而大名續授甲之士還迎立世宗于東京及大定之初  
幹罕既平乃散契丹隸諸明安穆昆至三年詔河北山  
東等路所簽軍有父兄俱亡充甲軍子弟又為伊勒希

恐其家更無丁男有誤農種與免一丁以驅丁充伊勒  
希無驅丁者於本明安穆昆內驗富強有驅丁者簽充  
十二年徙東北等戍邊漢軍於內地十五年十月遣吏  
部郎中富察烏琿等十人分行天下再定明安穆昆戶  
每穆昆戶不過三百七穆昆至十穆昆置一明安十七  
年又以西南西北招討司契丹餘黨心素狼戾復恐生  
事它時或有邊隙不為我用令遷之於烏庫哩實壘部  
及上京之地上謂宰臣曰北邊番戍之人歲冒寒暑往

來千里甚為勞若縱有一二馬牛一往則無還理且奪其農時不得耕種故嘗命卿等議以何術得罷其役使安于田里不知卿議何如也左丞相良弼對曰北邊之地不堪耕種不能長戍故須番戍耳上曰朕一日萬幾安能徧及卿等既為宰相以此急務反以為末事竟無一言甚勞朕慮往者叅政宗叙屢為朕言若以貧戶永屯邊境使之耕種官給糧廩則貧者得濟富戶免於更代之勞使之得勤農務若宗叙者可謂盡心為國矣朕

嘗思之宜以兩路招討司及烏庫哩寶壘部族臨潢府  
泰州等路分定保戍具數以聞朕親覽焉十八年命部  
族糾分番守邊二十年以祖宗平定天下以來所建立  
明安穆昆因循既久其間有戶口繁簡地里遠近不同  
又自正隆之後所授無度及大定間亦有功多未酬者  
遂更定以詔天下復命新授者並令就封其穆昆人內  
有六品以下職及諸局承應人皆為遷之三從以上族  
人願從行者明安不得過十戶穆昆不得過六戶詔戍



邊軍士年五十五以上許以其子及同居弟姪承替以  
奴代者罪之二十一年三月詔遣大興尹完顏托果斯  
遷河北東路兩明安上曰朕始令移此欲令與女直戶  
相錯安置久則自相姻親不生異意此長久之利也今  
者伊瑪河明安相錯以居甚符朕意而約羅河明安不  
如此可再遣兵部尚書張納延按視其地以雜居之二  
十二年以山東屯田戶鄰於邊鄙命聚之一處俾協力  
蠶種右丞相烏庫哩元忠曰彼方之人以所得之地為

家雖兄弟不同處故貧者衆參政鈕祜祿額特埒曰舊時兄弟雖析猶相聚種今則不然宜令約束之又以明安穆昆舊籍不明遇簽軍與諸差役及振濟增減不以實命括其口以實籍之二十三年遣刑部尚書伊喇愷遷山東東路八穆昆處之河間其棄地以山東東路特赫河明安下扎哈穆昆額勒敏鄂勒歡明安下錫布穆昆佛門山穆昆九村人戶徙於瑠僧安和二穆昆之舊地其未徙者之地皆薄惡且鄰寇壤遣使詢願徙者相

可居之地圖以進上嘗以率賓呼爾哈人驍勇可用海陵嘗欲徙之而未能二十四年以上京刷和倫之地廣而腴遂詔遣刑部尚書烏哩雅出府庫錢以濟行資牛畜遷率賓一明安呼爾哈二明安二十四穆昆以實之蓋欲上京兵多它日可為緩急之備也當是時多易置河北山東所屯之舊括民地而為之業戶頒牛而使之耕畜甲兵而為之備乃大重其權授諸王以明安之號或新置者特賜之名制其奢靡禁其飲酒習其騎射儲

其糧構其備至嚴也是時宗室戶百七十明安二百二

穆昆千八百七十八戶六十一萬五千六百二十四東

北路部族紮軍曰德呼勒部

永安三年改特哩  
衮扎薩克節度使

曰唐古

部

永安三年間改博勒  
和扎薩克節度使

二部五紮戶五千五百八十五

其它若珠魯部族烏爾古部族實壘部族蒙古部族奇

魯部族布塔布部族數皆稱是西北西南二路紮軍曰

蘇穆坦紮曰伊埒圖紮曰古勒敦紮唐古紮哈瑪爾紮

穆騰紮蒙古紮茂紮呼敦紮凡九其諸路曰海蘭曰扶

餘曰博索曰率賓曰呼爾哈曰伊蘭伊蘭後廢皆在上京之鄙或置總管府或置節度使至章宗明昌間欲國人兼知文武令明安穆昆舉進士試以策論及射以定其科甲高下承安四年上謂宰臣曰人有以八陣圖來上者其圖果何如朕嘗觀宋白所集武經具載攻守之法亦多難行右丞相清臣曰兵書一定之法難以應變本朝行兵惟用正奇二軍臨敵制變以正為奇以奇為正故無往不克上曰自古用兵亦不出奇正二法耳且

學古兵法如學奕棋未能自得於心欲用舊陣勢以接敵疎矣敵所應與舊勢異則必不可支然武經所述雖難遵行然知之猶愈不知泰和間又制武舉其制具在選舉志所謂渤海軍則渤海八明安之兵也所謂奚軍者奚人約尼扎古雅九明安之兵也奚兵初徙于山西後分遷河東其漢軍中都永固軍大定所置者也所謂鎮防軍則諸軍中取以更代戍邊者也在西北邊則有分番屯戍軍及永屯軍驅軍之別驅軍則國初所免遼

人之奴婢使屯守于泰州者也邊鋪軍則河南陝西居

守邊界者河東三虞候順德軍及章宗所置諸路効節

軍

京府節鎮設二十人防判設二十人

掌同弓手者也諸路所募射糧軍

五年一籍三十以下十七以上強壯者皆刺其

缺

所以

兼充雜役者也京師防城軍世宗大定十七年三月改

為武衛軍則掌京師巡捕者也其曰牢城軍則嘗為盜

竊者以充防築之役曰土兵則以司警捕之事凡漢軍

有事則簽取於民事已則或亦放免初天會間郭藥師

降有曰長勝軍者皆遼水側人也以鄉土歸金皆愁怨  
思歸宗望乃令罷還正隆間又嘗罷諸路漢軍而所存  
者猶有威勇威烈威捷順德及韓常之軍之號凡邊境  
置兵之州三十八鳳翔延安鄧鞏熙泗頰蔡隴秦河海  
壽唐商洮蘭會積石鎮戎保安綏德保德環葭澳寧邊  
東勝淨慶來遠桓昌海蘭博索扶餘率賓呼爾哈置於  
要州者十一南京東京益都京兆太原臨洮臨潢豐泰  
撫蓋及宣宗南遷虜軍潰去兵勢益弱遂盡擁明安戶



之老稚渡河僑置諸總管府以統之器械既缺糧糈不給腹民膏血而不足乃行括糧之法一人從征舉家待哺又謂無以堅戰士之心乃令其家盡入京師不數年至無以為食乃聽其出而國亦屈矣然初南渡時盡以河朔戰兵三十萬分隸河南行樞密及帥府往往蔽匿強壯驅羸弱使戰不能取勝後乃至以二十五人為穆昆四穆昆為明安每穆昆除旗鼓司火頭五人任戰者止十八人不足成隊伍但務存其名而已故混源劉祁

謂金之兵制最弊每有征伐及邊釁輒下令簽軍使遠  
近騷動民家丁男若皆強壯或盡取無遺號泣動乎鄰  
里嗟怨盈於道路驅此使戰欲其勝敵難矣初貞祐時  
下令簽軍會一時任子為監當者春赴吏部選宰執命  
取為監軍官皆憤愠哀號交愬臺省至衝宰相鹵薄以  
告丞相布薩齊錦大怒趣左右取弓矢射去已而上知  
其不可用命免之元光末備潼關黃河又簽軍諸使者  
歷縣邑自見居官外無文武小大職事官皆充軍至許

州前侍御史劉元規年幾六十亦選為千戶至陳州以  
祁父從益以前監察御史亦為千戶餘不可悉紀既立  
部伍必以軍律相臨物議紛然後亦罷之哀宗正大二  
年議選諸路精兵直隸密院先設總領六員分路揀閱  
因相合併每總領司率數萬人軍勢既張乃易總領之  
名為都尉班在隨朝四品之列曰建威曰虎威曰破虜  
振威鷹揚虎賁振武折衝盪寇殄寇必以嘗秉帥權者  
居是職雖帥府行院不敢以貴重臨之天興初元有十

五都尉先六人陞授在京建成鄂屯幹里雅布許州折

衝瓜爾佳澤

本姓樊

陳州振武幹色辛

本姓李

蔡州盪寇富

察達希布申裕安平完顏色埒默嵩汝振武唐古哈克  
繼續封金昌府虎威赫舍哩奇爾宣權歸德果毅完顏  
珠爾南京殄寇完顏阿巴宣權潼關都尉三虎賁完顏  
辰爾鷹揚內族大羅索全節復取河朔諸路歸正人不  
問馬有無譯語能否悉送密院增月給三倍它軍授官  
馬得千餘人歲時犒燕名忠孝軍以舒穆魯延善努富

察鼎珠統之加以正大已後諸路所虜臨陣所獲皆放歸鄉土同忠孝軍給其犒賞使河朔俘係知之故此軍迄于天興至七千千戶以上將帥尚不預焉又以歸正人過多乃係於忠孝籍中別為一軍減忠孝所給之半不能射者令閱習一再月然後試補忠孝軍是所謂和爾和軍也又以親衛馬軍舊時所選未精必加閱試直取武藝如忠孝軍者得五千人餘罷歸為步軍凡進征忠孝居前馬軍次之自正大改立馬軍隊伍較勒兵甲

一切更新將相舊人自謂國家全盛之際馬數則有之  
至於軍士精銳器仗堅整較之今日有不侔者中興之  
期為有望矣一日布列曹門內教場忠孝軍七千馬軍  
五千京師所屯建威都尉軍萬人內族玖珠所統親衛  
軍三千及阿巴所統四千皆哀宗控制樞密院時所選  
教場地約三十頃尚不能容餘都尉十三四軍猶不在  
是數此外招集義軍名曰忠義要皆燕趙亡命雖獲近  
用終不可制異時擅殺北使唐慶以速金亡者即此曹

也

禁軍之制本於哈濟穆昆哈濟者言親軍也以近親所  
領故以名焉貞元遷都更以太祖遼王宗幹秦王宗翰  
軍為哈濟明安謂之侍衛親軍故立侍衛親軍司以統  
之舊常選諸軍之材武者為護駕軍海陵又名上京龍  
翔軍為神勇軍正隆二年將南伐乃罷歸使就僉調後  
於侍衛親軍四明安

舊止曰太祖遼王秦王明安凡三  
今日四明安未詳豈太祖兩明安

耶

內選三十以下千六百人騎兵曰龍翔步兵曰虎步

以備宿衛五年罷親軍司以所掌付大興府置左右驍  
騎所謂從駕軍也置都副指揮使隸點檢司步軍都副  
指揮使隸宣徽院大定初親軍置四千人二十二年省  
為三千五百上京亦設守衛軍是年尚書省奏上京既  
設皇城提舉官亦當設軍守衛上曰可設四百五十馬  
一百二十分三番更代異時朕至上京即作兩番巡警  
限以半年交替人日給錢五十米一升半馬給芻粟明  
安穆昆官可差年四十上下者軍士並取三十以上者



充章宗永安四年增為五千又增至六千又有威捷軍  
永安增簽弩手千人凡選弩手之制先以營造尺度杖  
其長六尺立之謂之等杖取身與杖等能踏弩至三石  
鋪弦解索登踏閑習射六箭皆上垛內二箭中貼者又  
選親軍取身長五尺五寸善騎射者明安穆昆以名上  
兵部移點檢司宣徽院試補之又設護衛二百人近侍  
之執兵杖者也取五品至七品官子孫及宗室併親軍  
諸局分承應人身長五尺六寸者選試補之又設控竄

二百人皆以備出入者也。大將府治之稱號。收國元年十二月始置咸州軍帥司。以經畧遼地。討高永昌。置南路都統司。且以討張覺。天輔五年襲遼主。始有內外諸軍都統之名。時以奚未平。又置奚路都統司。後改為六部路都統司。以約尼九營為九。明安隸焉。與上京及泰州凡六處置。每司統五六萬人。又以渤海軍為八。明安凡明安之上置軍帥。軍帥之上置萬戶。萬戶之上置都統。然時亦稱軍帥為明安。而明安則稱親管明安者。燕

山既下循遼制立樞密院于廣寧府以總漢軍太宗天會元年以襲遼主所立西南都統府為西南西北兩路都統府三年以伐宋更為元帥府置元帥及左右副及左右監軍左右都監金制都元帥必以安班貝勒為之恒居守而不出六年詔還二帥以鎮方面諸路各設兵馬都總管府州鎮置節度使沿邊諸州則置防禦使凡州府所募射糧軍牢城軍每五百人為一指揮使司設使分為四都都設左右什將及承局押官其軍數若有

餘或不足則與近者合置不可合者或三百人或二百人亦設指揮使若百人則止設軍使百人以上立為都  
不及百人止設什將及承局管押官各一員十年改南  
京路都統司為東南路都統司治東京以鎮高麗後又  
置統軍司于大名府及海陵天德二年八月改諸京兵  
馬都部署司為本路都總管府九月罷大名統軍司而  
置統軍司于山西河南陝西三路以元帥府都監監軍  
為使分統天下兵又改烏爾古德呼勒路統軍司為招

討司博索路統軍司為總管府三年以元帥府為樞密院罷萬戶之官詔曰太祖開叛因時制宜材堪統衆授之萬戶其次千戶及穆昆當時官賞未定城郭未下設此職許以世襲乃權宜之制非經久之利今子孫相繼專攬威權其戶不下數萬與留守總管無異而世權過之可罷是官若舊無千戶之職者續思增置國初時賜以國姓若為子孫者皆令復舊正隆末復陞陝西統軍司為都統府大定五年復罷府降為統軍司尋又設兩

招討司與前凡三以鎮邊陲東北路者初置烏爾古德  
呼勒部後置于泰州泰和間以去邊尚三百里宗浩乃  
命分司于金山西北路者置於應州西南路者置於桓  
州以重臣知兵者為使列城濠戍守為永制樞密院每  
行兵則更為元帥府罷則復為院宣宗貞祐三年徵代  
州戍兵五千從胥鼎言留代以屏平陽興定二年選募  
河南陝西弩手軍二千人為一軍賜號威勇及南遷河  
北封九公因其兵假以便宜從事沿河諸城置行樞密

院元帥府大者有便宜之號小者有從宜之名元光間時招義軍以三十人為穆昆五穆昆為一千戶四千戶為一萬戶四萬戶為一副統兩副統為一都統此復國初之名也然又外設一總領提控故時皆稱元帥為總領云金初因遼諸茂而分置羣牧茂之為言無蚊蚋美水草之地也天德間置迪河鄂爾多阿爾本富僧額永安沃濟五羣牧所皆仍遼舊名各設官以治之又於諸色人內選家富丁多及品官家子明安穆昆佛寧軍與

司吏家餘丁及奴使之司牧謂之羣子分牧馬駝牛羊  
為之立蕃息衰耗之刑賞後稍增其數為九契丹之亂

遂亡其五四所之所存者馬千餘牛二百八十餘羊八

百六十駝九十而已世宗置所七日特們圖們

在撫州

阿

都齊布沙堪

布沙堪本阿都齊地大定七年分其地置之水安三年改為班第音烏呼濟庫

額

勒本

永安三年改烏遜烏呼濟庫烏呼濟庫者言滋息也

和囉噶伊囉幹

在武平縣臨潢

泰州之境

大定二十年三月更定羣牧官詳衮托迪扎布羣

牧人滋息損耗賞罰格二十一年勅諸所馬三歲者付



女直人牧之牛或以借民耕或又令民畜羊或以振貧戶時遣使閱實其數缺則杖其官而令牧人償之匪其實者監察舉覺之二十八年蕃息之久馬至四十七萬牛十三萬羊八十七萬駝四千明昌五年散驂馬令中都西京河北東西路驗民物力分畜之又令它路民養馬者死則於前四路所養者給換若欲用則悉以送官此金之馬政也然每有大役必括於民及取羣官之餘騎以供戰士馬宣宗興定元年定民間收潰軍亡馬之

法及以馬送官酬直之格上等馬一匹銀五十兩中下  
遞減十兩不顧酬直者上等二匹補一官雜班任使中  
等三匹下等四匹如之令下十日陳首限外匿及殺竝  
絞又遣官括市民馬立賞格以示勸五百匹以上鈔千  
貫千匹以上一官二千匹以上兩官

養兵之法熙宗天眷三年正月詔歲給遼東戍卒紬絹  
有差正隆四年命河南陝西統軍司并虞候司順德軍  
官兵竝增廩給六年將南征以絹萬匹于京城易衣襖

穿滕一萬以給軍世宗大定三年南征軍士每歲可支  
一千萬貫官府止有二百萬貫外可取於官民戶此軍  
須錢之所由起也時言事者以山東河南陝西等路循  
宋齊舊例州縣司吏弓手於民間驗物力均數顧錢名  
曰免役請以是錢贍軍至是省具數以聞詔罷弓手錢  
其司吏錢仍舊四年六月奏元帥府乞降軍須錢上曰  
帥府支費無度例皆科取於民甚非朕意仰會計軍須  
支用不盡之數及諸路轉運司見在如實缺用則別具

以聞十年四月命德順州建營屋以處屯軍十七年七月歲以羊皮三萬賜西北路戍兵永安三年以軍須所費甚大乞驗天下物力均徵擬依黃河夫錢例徵軍須錢驗各路新籍物力每貫徵錢四貫西京北京遼東路每貫徵錢二貫臨潢全州則免徵周年三限送納恐期遠遂定制半年三限輸納凡河南陝西山東放老千戶穆昆佛寧正軍伊勒希等給賞之例舊軍千戶十年以上賞銀五十兩絹三十匹不及十年比附十年以上

穆昆支穆昆十年以上銀四十兩絹二十五匹不及十年銀三十兩絹二十匹佛寧十年以上銀三十兩絹二十匹不及十年銀二十兩絹一十五匹馬步正軍伊勒希等勾當不拘年分放老正軍銀十五兩絹一十匹伊勒希旗鼓吹笛本司火頭人等同銀八兩絹五匹三虞候千戶十年以上銀四十兩絹二十五匹不及十年銀三十兩絹二十匹穆昆二十年以上銀五十兩絹三十匹十年以上銀三十兩絹二十匹不及十年銀一十

兩絹一十五匹佛寧十年以上銀二十兩絹一十五匹  
不及十年銀一十五兩絹一十匹正軍伊勒希勾當不  
拘年分放老正軍銀一十兩絹七匹伊勒希旗鼓吹笛  
本司火頭人等同銀五兩絹四匹北邊萬戶千戶穆昆  
等歷過軍功及年老放罷給賞之例

遷官同從  
吏部格

正千戶

管押萬戶勾當過一十五年遷兩官與從五品不及一  
十五年老放罷遷一官與正六品若若十年以下遷一  
官賞銀絹六十兩匹正穆昆管押萬戶勾當一十五年

遷兩官與正六品不及一十五年年老放罷遷一官與正七品若十年以下遷一官賞銀絹五十兩匹正千戶管押千戶勾當過二十年遷一官與正六品不及二十年年老放罷遷一官與正七品若十年以下遷一官賞銀絹四十兩匹正穆昆管押千戶以下依河南陝西體例凡鎮防軍每年試射射若有出衆上等賞銀四兩特異衆者賞十兩銀馬孟簽充武衛軍挈家赴京者人日給六口糧馬四匹芻藁諸招軍月給例物邊鋪軍錢五

十貫絹十匹軍匠上中等錢五十貫絹五匹下等錢四十貫絹四匹黃河埽兵錢三十貫絹五匹射糧軍及溝渠等處埽兵水手錢二十貫絹二匹土兵錢十貫絹一匹凡射糧軍指揮使及黃沁埽兵指揮使錢粟七貫石絹六匹軍使錢粟六貫石絹同上什將錢二貫粟三石春衣錢五貫秋衣錢十貫承局押官錢一貫五百文粟二石春衣錢五貫秋衣錢七貫牢城并土兵錢八百文粟二石春衣錢四貫秋衣錢六貫邊鋪軍請給與射糧



軍同河南陝西山東路統軍司鎮防甲軍馬軍明安錢  
八貫米五石二斗絹八匹六馬芻粟穆昆錢六貫米二  
石八斗絹六匹五馬芻粟佛寧錢四貫米石七斗絹五  
匹四馬芻粟正軍錢二貫米石五斗絹四匹綿十五兩  
兩馬芻粟伊勒希錢一貫五百文米七斗絹三匹綿十  
兩步軍明安馬二匹穆昆馬一匹芻粟每馬給芻一束  
粟五升歲仲春野有青草馬可牧養則止惟每明安當  
差馬七十二匹四時皆給又定制河南山東河東歲給

五月陝西六月鎮防軍補買馬錢河南路正軍五百文  
伊勒希隨色人三百文陝西山東路正軍三百文伊勒  
希隨色人二百文諸屯田被差及緣邊駐扎捉殺軍明  
安月給錢六貫米一石八斗五馬芻粟穆昆錢四貫米  
一石二斗三馬芻粟佛寧錢二貫米六斗二馬芻粟正  
軍錢一貫五百文米四斗一馬芻粟伊勒希隨色人錢  
一貫米四斗一馬芻粟德順軍指揮使錢六貫米二石  
八斗絹六匹三馬芻粟軍使什將錢四貫米一石七斗

絹五匹給兩馬料長行錢二貫米一石五斗絹四匹綿  
十五兩給一馬料奚軍穆昆錢一貫五百文米一石五  
斗紬絹春秋各一匹給三馬料佛寧錢一貫米二石七  
斗紬絹同上給二馬料長行錢一貫米一石八斗紬絹  
同上飼一馬北邊臨潢等處永屯駐軍千戶錢八貫米  
五石二斗絹八匹飼馬六匹步軍飼兩馬地五頃穆昆  
錢六貫米二石八斗絹六匹飼五馬地四頃佛寧錢四  
貫米一石七斗絹五匹飼四馬地三頃正軍錢二貫米

一石四斗五升絹四匹飼兩馬綿十五兩地二頃伊勒  
希錢一貫五百文米七斗絹三匹綿十兩地一頃旗鼓  
司人與伊勒希同交替錢二貫米四斗斗伊勒希錢一  
貫五百文米四斗上蕃漢軍千戶月給錢三貫糧四石  
絹八匹飼四馬穆昆錢二貫五百文糧一石絹六匹飼  
二馬正軍錢二貫米九斗五升絹四匹上京路永屯駐  
軍所除授千戶月給錢粟十五貫石絹十匹綿二十兩  
飼三馬穆昆錢六貫米二石八斗絹六匹飼二馬正東

月支錢二貫五百文米一石二斗絹四匹綿十五兩飼  
一馬伊勒希隨色人錢二貫米一石二斗絹四匹綿十  
五兩諸北邊永駐軍月給補買馬錢四百文隨色人三  
百文貞祐三年軍前委差及掌軍官規圖糧料冒占職  
役皆無實員又見職及遙授者已有俸給又與無職事  
者同支券糧故時議欲省員減所給之數俟征行則全  
給之及興定二年彰化軍節度他張行信言一軍充役  
舉家廩給蓋欲感悅士心使為盡力耳耳至於無軍之

家復無丁男而妻女猶受給何謂耶五年京南行三司  
官舒穆魯幹魯言京南東西三路見屯軍戶老幼四十  
萬口裁費糧百四十餘萬石皆坐食民租甚非善計語  
在田制諸屯田軍人如差防送日給錢一百五十文看  
管考寧宮以月各給米五斗柴一車春秋衣纛布一匹  
秋絹二匹綿一十五兩諸黃院子年滿者以元請錢糧  
三分內給一貫石養老

金史卷四十四

# 欽定四庫全書

史部

金史卷四十五  
七

詳校官國子監祭酒臣覺羅言善

內閣中書臣李彤覆勘

總校官舉人臣章維桓

校對官學錄臣常循

謄錄監生臣張彭齡



欽定四庫全書

金史卷四十五

元中書右丞相總裁托克托等修

志第二十六

刑

昔者先王固人之知畏而作刑因人之知恥而作法畏也恥也五性之良知是情之大閑也是故刑以治已然法以禁未然畏以處小人恥以遇君子君子知恥小人

知畏天下平矣是故先王養其威而用之畏可以教愛  
慎其法而行之恥可以立廉愛以興仁廉以興義仁義  
興刑法不幾於措乎金初法制簡易無輕重貴賤之別  
刑贖並行此可施諸新國非經世久遠之規也天會以  
來漸從吏議皇統頒制兼用古律厥後正隆又有續降  
制書大定有權宜條理有重修制條明昌之世律義勅  
條並條品式寢備既而泰和律義成書宜無遺憾然國  
脈紆蹙風俗醇醜世道升隆君子觀一代之刑法每有

以先知焉金法以杖折徒累及二百州縣立威甚者置刃於杖虐於肉刑季年君臣好用筐篋故習由是以深文傳致為能吏以慘酷辦事為長才百司姦賊真犯此可決也而微過亦然風紀之臣失糾皆決考滿校其受決多寡以為殿最原其立法初意欲以同疏戚一小大使之咸就繩約於律令之中莫不齊手並足以聽公上之所為蓋秦人強主威之意也是以待宗室少忍待大夫士少禮終金之代忍恥以就功名雖一時名士有所

不免至於避辱遠引罕聞其人殊不知君子無恥而犯義則小人無畏而犯刑矣是故論者於教愛立廉之道往往致太息之意焉雖然世宗臨御法司奏讞或去律援經或揆義制法近古人君聽斷言幾於道鮮有及之者章宗宣宗嘗親民事當宁裁決寬猛出入雖時或過中迹其矜恕之多猶有祖風焉簡牘所存可為龜鑑者本紀刑志詳畧互見云

金國舊俗輕罪答以柳蓼殺人及盜劫者擊其腦殺之

沒其家貲以十之四入官其六賞主併以家人為奴婢  
其親屬欲以馬牛雜物贖者從之或重罪亦聽自贖然  
恐無辨於齊民則劓刵以為別其獄則掘地深廣數丈  
為之太宗雖承太祖無變舊風之訓亦稍用遼宋法天  
會七年詔凡竊盜但得物徒三年十貫以上徒五年刺  
字充下軍三十貫以上徒終身仍以賊滿盡命刺字於  
面五十貫以上死徵償如舊制熙宗天眷元年十月禁  
親王以下佩刀入宮衛禁之法實自此始三年復取河

南地乃詔其民約所用刑法皆從律文罷獄卒酷毒刑具以從寬恕至皇統間詔諸臣以本朝舊制兼採隋唐之制參遼宋之法類以成書名曰皇統制頒行中外時制杖罪至百則臀背分決及海陵庶人以背近心腹遂禁之雖主決奴婢亦論以違制又多變易舊制至正隆間者為續降制書與皇統制並行焉然二君任情用法自有異於是者矣及世宗即位以正隆之亂盜賊公行兵甲未息一時制旨多從時宜遂集為軍前權宜條理

大定四年尚書省奏大興民男子李十婦人楊仙哥並以亂言當斬上曰愚民不識典法有司亦未嘗丁寧誥戒豈可遽加極刑以減死論五年命有司復加刪定條理與前制書兼用七年左藏庫夜有盜殺都監郭良臣盜金珠求盜不得命點檢司治之執其可疑者八人鞠之掠三人死五人誣伏上疑之命同知大興府事伊喇道雜治既而親軍百夫長額森博勒嚮金於市事覺伏誅上聞曰箠楚之下何求不得奈何鞠獄者不以情求

之乎賜死者錢人二百貫不死者五十貫於是禁護衛  
百夫長五十夫長非直日不得帶刀入宮是歲斷死囚  
二十人八年制品官犯賭博法贓不滿五十貫者其法  
杖聽贖再犯者杖之且曰杖者所以罰小人也既為職  
官當先廉恥既無廉恥故以小人之罰罰之九年因御  
史臺奏獄事上曰近聞法官或各執所見或觀望宰執  
之意自今制無正條者皆以律文為準復命杖至百者  
臀背分受如舊法已而上謂宰臣曰朕念罪人杖不分



受恐至深重乃命復舊今聞民間有不欲者其令罷之  
十年尚書省奏河中府張錦自言復父讐法當死上曰  
彼復父讐又自言之烈士也以減死論十一年詔諭有  
司曰應司獄解舍須近獄安置囚禁之事常親提控其  
獄卒必選年深而信實者輪直十二年尚書省言內邱  
令富察台布自科部內錢立德政碑復有其餘錢二百  
餘貫罪當除名今遇赦當赦仍免微贓上以貪偽勿赦  
且曰乞取之贓若以赦原予者何辜自今可並追還其

主惟應入官者免徵尚書省奏盜有發塚者上曰功臣墳墓亦有被發者蓋無告捕之賞故人無所畏自今告得實者量與給賞故咸平尹舒穆魯阿瑪拉以賊死於獄上謂其不尸諸市已厚幸貧窮而為盜賊蓋不得已三品職官以賊至死愚亦甚矣其諸子可皆除名先是詔自今除名人子孫有在仕者並取奏裁十三年詔立春後立秋前及大祭祀月朔望上下弦二十四氣雨未晴夜未明休暇并禁屠宰日皆不聽決死刑惟強盜則

不待秋後十五年詔有司曰朕惟人命至重而在制竊盜賊至五十貫者處死自今可令至八十貫者處死十七年陳言者乞設提刑司以糾諸路刑獄之失尚書省議以謂久恐滋弊上乃命距京師數千里外懷冤上訴者集其事以待選官就問時濟南尹梁肅言犯徒者當免杖朝廷以為今法已輕於古恐滋姦惡不從嘗詔宰臣朝廷每歲再遣審錄官本以為民伸冤滯也而所遣多不盡心但文具而已審錄之官非止理問重刑凡訴

訟案牘皆當閱實是非囚徒不應囚繫則當釋放官吏之罪即以狀聞失糾察者嚴加懲斷不以贖論又以監察御史體察東北路官吏輕受訟牒為不稱職笞之五十又謂宰臣曰比聞大理寺斷獄雖無疑者亦經旬月何耶叅知政事伊喇道對曰在法決死囚不過七日徒刑五日杖罪三日上曰法有程限而輒違之弛慢也罷朝御批送尚書省曰凡法寺斷重輕罪各有期限法官但犯皆的決豈敢有違但以卿等所見不一至於再三

批送其議定奏者書奏牘亦不下旬日以致事多滯留  
自今當勿復爾又曰故廣寧尹高禎為政尚猛雖小過  
有杖而殺之者即罪至於死而情或可恕猶當念之況  
其小過者乎人之性命安可輕哉上以正隆續降制書  
多任已意傷於苛察而與皇統之制並用是非淆亂莫  
知適從姦吏因得上下其手遂置局命大理卿伊喇慥  
總中外明法者共校正乃以皇統正隆之制及大定軍  
前權宜條理後續行條理論其輕重刪繁正失制有闕

者以律文足之制律俱闕及疑而不能決者則取旨畫  
定軍前權行條理內有可以常行者亦為定法餘未應  
者亦別為一部存之叅以近所定徒杖減半之法凡校  
定千一百九十餘分為十二卷以大定重修制條為名  
詔頒行焉二十年以上見有蹂踐禾稼者謂宰相曰今後  
有踐民田者杖六十盜人穀者杖八十並償其直二十  
一年尚書省奏鞏州民馬俊妻安姐與管卓姦俊以斧  
擊殺之罪當死上曰可減死一等以戒敗風俗者二十

二年上謂宰臣曰凡尚書省送大理寺文字一斷便可  
聞奏如烏庫哩公說事近取觀之初送法寺如法裁斷  
再送司直披詳又送闔寺參詳反覆三次妄生情見不  
得結絕朕以國政不宜滯留昨雖炙艾六百炷未嘗一  
日不坐朝欲使卿寺知勤政也自今可止一次送寺闔  
寺披詳苟有情見即具以聞毋使滯留也二十三年尚  
書省奏益都民范德年七十六為劉祐毆殺祐法當死  
以祐父母年俱七十餘家無侍丁上請上曰范德與祐

父母年相若自當如父母相待至毆殺之難議未減其  
論如法尚書省奏招討司官及圖哩乞取本部財物制  
上曰遠人止可矜恤若進貢不闕更以兵邀之強取財  
物與盜何異且或因而生事何可不懲又曰朕所行制  
條皆臣下所奏行者天下事多人力有限豈能一一盡之  
必因一事奏聞方知有所窒礙隨即更定今有聖旨  
條理復有制條是使姦吏得以輕重也大興府民趙無  
事帶酒亂言父干捕告法當死上曰為父不恤其子而



告捕之其正如此人所甚難可特減死一等武器署丞  
奕直長固納坐受草畔卒財奕杖八十固納笞二百監  
察御史梁襄等坐失糾察罰俸一月上曰監察人君之  
耳目事由朕發何以監察為上以法寺斷獄以漢字譯  
女直字會法又復各出情見妄生穿鑿徒致稽緩遂詔  
罷情見二十五年二月上以婦人在囚輸作不便而杖  
不分決與殺無異遂命免死輸作者決杖二百而免輸  
作以臀背分決時后族有犯罪者尚書省引八議奏上

曰法者公天下持平之器若親者犯而從減是使之恃此而橫恣也昔漢文誅薄昭有足取者前二十年時后族濟州節度使烏凌阿楚呼嘗犯大辟朕未嘗宥今乃宥之是開後世輕重出入之門也宰臣曰古所以議親尊天子別庶人也上曰外家自異於宗室漢外戚權太重至移國祚朕所以不令諸王公主有權也夫有功于國議勲可也至若議賢既曰賢矣肯犯法乎脫或緣坐則固當減請也二十六年遂奏定太子妃大功以上親

及與皇家無服者及賢而犯私罪者皆不入議上謂宰  
臣曰法有倫而不倫者其改定之監察御史陶鈞以攜  
妓遊北苑歌飲池島間道近殿廷提控官石玠聞而發  
之鈞令其友閻恕屬玠得緩既而事覺法司奏當徒二  
年半詔以鈞耳目之官攜妓入禁苑無上下之分杖六  
十玠恕皆坐之二十八年上以制條拘於舊律間有難  
解之詞命刪修明白使人皆曉之舊禁民不得收制書  
恐滋告訐之弊章宗大定二十九年言事者乞許民藏

之平章張汝霖曰昔子產鑄刑書叔尚議之者蓋不欲預使民測其輕重也今著不刊之典使民曉然知之猶江河之易避而難犯足以輔治不禁為便以衆議多不欲詔姑令仍舊禁之明昌元年上問宰臣曰今何不專用律文平章政事張汝霖曰前代律與令各有分具有犯令以律決之今國家制律混淆固當分也遂置詳定所命審定律令承安二年制軍前受財法一貫以下徒二年以上徒三年十貫處死符寶典書北京努盜符寶

局金牌伏誅仍除屬籍愛呼阿古岱失覺察各杖七十  
泰和二年御史臺奏監察御史史肅言大定條理自二  
十年十一月四日前以奴娶良人女為妻者並準已娶  
為定若夫亡拘放從其主離夫摘賣者令本主收贖依  
舊與夫同聚放良從良者即聽贖換如未贖換間與夫  
所生男女並聽為良而泰和新格復以夫亡服除準良  
人例離夫摘賣及收夫為良者並聽為良若未出離再  
配與奴或雜姦所生男女並許為良如此不同皆編格

官妄為增減以致隨處訴訟紛擾是涉違枉勅付所司正之初詔凡條格入制文內者分為別卷復詔制與律文輕重不同及律所無者各校定以聞如禁屠宰之類當著于令也慎之勿忽律令一定不可更矣三年七月右司郎中孫鐸先以詳定所校名例篇進既而諸篇皆成復命中都路轉運使王寂大理卿董師中等重校之四年七月上以諸路枷杖多不如法平章政事守貞曰枷杖尺寸有制提刑兩月一巡察必不敢違法也五年

正月復令鈎校制律即付詳定所時詳定官言若依重修制文為式則條目增減罪名輕重當異於律既定復興舊同頒則使人惑而易為姦矣臣等謂用今制條參酌時宜準律文修定歷採前代刑書宜於今者以補遺闕取刑統疏文以釋之著為常法名曰明昌律義別編權貨邊部權宜等事集為勅條宰臣謂先所定令文尚有未完俟皆通定然後頒行若律科舉人則止習舊律遂以知大興府事尼瑪哈鑑御史中丞董師中翰林待

制鄂屯忠孝

小字雅格

提點司天臺張嗣翰林修撰完顏薩

喇刑部員外郎李庭義大理丞麻安止為校定官大理

卿閭公貞戶部侍郎李敬義工部郎中賈鉉為覆定官

重修新律焉時奏獄而法官有獨出情見者上曰或言

法官不當出情見故論者紛紛不已朕謂情見非出於

法外但折衷以從法爾平章守貞曰是制自大定二十

三年罷之然律有起請諸條是古亦許情見矣上曰科

條有限而人情無窮情見亦豈可無也明昌五年尚書



省奏在制名例內徒年之律無決杖之文便不用杖緣  
先謂流刑非今所宜且代流役四年以上俱決杖而徒  
三年以下難復不用婦人比之男子雖差輕亦當例減  
遂以徒二年以下者杖六十二年以上杖七十婦人犯  
者並決五十著于勅條永安三年勅尚書省自今特旨  
事如律令程式者始可送部其餘躬行之事但名部官  
赴省議之四年四月尚書省請再覆定令文上因勅宰  
臣曰凡事理明白者轉奏可也文牘多者恐難徧覽具

三推情疑以聞五月上以法不適平常行杖樣多不能用遂定分寸鑄銅為杖式頒之天下且曰若以笞杖太輕恐情理有難恕者訊杖可再議之五年五月刑部員外郎馬復言外官尚苛刻者不遵銅杖式輕用大杖多致人死詔令按察司糾劾黜之先嘗令諸死囚及除名罪所委官相去二百里外并犯徒以下逮及二十人以上者並令其官就讞之刑部員外郎完顏綱言自是制行如上京最近之地往還不下三二千里如北京留守

司亦動經數月愈致稽留未便詔復從舊令委官追取  
鞠之十二月翰林修撰楊庭秀言州縣官往往以權勢  
自居喜怒自任聽訟之際鮮克加審但使譯人往來傳  
詞罪之輕重成於其口貨賂公行寃者至有三二十年  
不能正者上遂命定立條約違者按察司糾之且謂宰  
臣曰長貳官委幕職及司吏推問獄囚命申御史臺聞  
奏之制當復舉行也又命編前後條制書之于冊以備  
將來考驗泰和元年正月尚書省奏以見行銅杖式輕

細姦究不畏遂命右司量所犯用大杖且禁不得過五  
分十二月所修律成凡十有二篇一曰名例二曰衛禁  
三曰職制四曰戶婚五曰廐庫六曰擅興七曰盜賊八  
曰關訟九曰詐偽十曰雜律十一曰捕七十二曰斷獄  
實唐律也但加贖銅皆倍之增徒至四年五年為七削  
不宜於時者四十七條增時用之制百四十九條因而  
畧有所損益者二百八十有二條餘百二十六條皆從  
其舊又加以分其一為二分其一為四者六條凡五百

六十三條為三十卷附注以明其事疏義以釋其疑名  
曰泰和律義自官品令職員令之下曰祠令四十八條  
戶令六十八條學令十一條選舉令八十三條封爵令  
九條封贈令十條宮衛令十條軍防令二十五條儀制  
令二十三條衣服令十條公式令五十八條祿令十七  
條倉庫令七條廐牧令十二條田令十七條賦役令二  
十三條關市令十三條捕亡令二十條賞令二十五條  
醫疾令五條假寧令十四條獄官令百有六條雜令四

十九條釋道令十條營繕令十三條河防令十一條服制令十一條附以年月之制曰律令二十卷又定制勅九十五條權貨八十五條番部三十九條曰新定勅條三卷六部格式三十卷司空襄以進詔以明年五月頒行之貞祐三年上謂宰臣自今監察官犯罪其事關軍國利害者並答決之貞祐四年詔凡監察失糾劾者從本法論外使入國私通本國事情宿衛近侍官承應人出入親王公主宰執家災傷乏食有司檢覈不實致傷

人命轉運軍儲而有私載考試舉人而防閑不嚴其罰  
並決在京犯至兩次者臺官減監察一等治罪論贖餘  
止坐專差任滿日議定若任內曾以漏察被決依格雖  
為稱職止從平常平常者從降罰興定元年八月上謂  
宰臣曰律有八議今言者或謂應議之人即當減等何  
如宰臣對曰凡議者先條所坐及應議之狀以請必議  
定然後奏裁也上然之曰若不論輕重而輒減之則貴  
戚皆將恃此以虐民民何以堪

金史卷四十五